

კონფერენცია „გერმანული და ქართული ნოტარიატის გაცვიფრულება“

ნინო ხარიტონაშვილი

სამართლის დოქტორი, სსიპ საქართველოს ნოტარიუსთა პალატა, ასოცირებული პროფესორი: კავკასიის უნივერსიტეტი, ალტე უნივერსიტეტი, გურამ თავართქილაძის სახელობით უნივერსიტეტ

საქართველოს ნოტარიუსთა პალატის ეგიდით და საქართველოს იუსტიციის სამინისტროს მხარდაჭერით 2023 წლის 3 თებერვალს გაიმართა საქართველოსა და გერმანიის ფედერალური ნოტარიატის ურთიერთთანამშრომლობის მემორანდუმის ხელმოწერის ცერემონიალი და გაიმართა კონფერენცია „გერმანული და ქართული ნოტარიატის გაცვიფრულება“.

მემორანდუმი საქართველოსა და გერმანიის ნოტარიუსთა პალატებს შორის სანოტარო მომსახურების დახვეწისა და განვითარებისთვის ურთიერთთანამშრომლობის გაღრმავებას ითვალისწინებს.

თანამშრომლობის ფარგლებში, ერთობლივი პროექტების საფუძველზე, გაიმართება სამართლებრივი სემინარები, კონფერენციები. მემორანდუმი უზრუნველყოფს, ასევე, სანოტარო საინფორმაციო ტექნოლოგიების სფეროში გამოცდილების გაზიარებას.

ურთიერთთანამშრომლობის მემორანდუმს ხელი მოაწერეს საქართველოს ნოტარიუსთა პალატის თავმჯდომარემ დავით ფუტყარაძემ და გერმანიის ნოტარიუსთა ფედერალური პალატის საერთაშორისო ურთიერთობების მთავარმა წარმომადგენელმა, სასამართლო მრჩეველმა რიხარდ ბოკმა.

მემორანდუმის გაფორმებას საქართველოში გერმანიის ელჩი პეტერ ფიშერი და საკონსულო და სამართლებრივი განყოფილების ხელმძღვანელი მიხაილ გრიმი დაესწრნენ.

კონფერენცია კონფერენცია „გერმანული და ქართული ნოტარიატის გაცვიფრულება“ გაიხსნა

საქართველოს ნოტარიუსთა პალატის თავმჯდომარის - დავით ფუტყარაძის, გერმანიის ნოტარიუსთა ფედერალური პალატის საერთაშორისო საკითხების მთავარი წარმომადგენლის, სასამართლო მრჩეველის - რიხარდ ბოკის, გერმანიის ფედერალური რესპუბლიკის ელჩის საქართველოში - პეტერ ფიშერის მისასალმებელი სიტყვით.

კონფერენციის მოდერაციას ახორციელებდა სსიპ საქართველოს ნოტარიუსთა პალატის იურისტი ჯაბა ჯამაგიძე.

თემაზე „სამართლებრივი დოკუმენტების დიგიტალიზაცია გერმანიაში“ მოხსენება წარმოადგინა გერმანიის ნოტარიუსთა ფედერალური პალატის წარმომადგენელი დავიდ სიგელმა. მან ღონისძიების მონაწილეებს გააცნო „ონლაინ დამოწმების სისტემა და დამოწმებული დოკუმენტების ელექტრონული არქივი“. ევროპარლამენტისა და საბჭოს (EU) 2019/1151 დირექტივის (ციფრული ინსტრუმენტებისა და პროცესების გამოყენებას კომპანიების სამართალში) ფარგლებში აღიარებულ იქნა ნოტარიუსების მნიშვნელოვანი როლი სამართლებრივი უსაფრთხოების უზრუნველსაყოფად და უფლებების ბოროტად გამოყენების თავიდან ასაცილებლად. შესაბამისად, კომპანიების დაფუძნების ახალი ონლაინ ფორმირების პროცედურა დაინერგა ნოტარიუსების მონაწილეობით. აღსანიშნავია, რომ გერმანიაში დისტანციური ავთენტიფიკაცია გამოიყენება მხოლოდ კომპანიების ონლაინ ფორმირებისა და რეგისტრაციის

დროს. პროცედურის დროს გათვალისწინებულია ისეთი მნიშვნელოვანი მიზნები, როგორებიცაა, მხარეთა საიმედო იდენტიფიკაციის უზრუნველყოფა, მხარეთა ქმედუნარიანობისა და თავისუფალი ნების შემოწმება, ყოვლისმომცველი იურიდიული კონსულტაციის გაწევა და დოკუმენტების ფორმირების მაღალი ხარისხი. შედეგად იქმნება ციფრული ავთენტური აქტი, რომელზე ხელმოწერაც ხდება მხარეთა კვალიფიციური ელექტრონული ხელმოწერებით.

თემაზე „ქართული ნოტარიატის გაციფრულება“ მოხსენება გააკეთა სსიპ საქართველოს ნოტარიუსთა პალატის იურისტმა ნინო ხარიტონაშვილმა. მოხსენებაში აღინიშნა, რომ გაციფრულების პროექტი ნოტარიუსთა პალატის პრიორიტეტია. დღეისათვის საქართველოს ნოტარიატი ასრულებს ისეთ დისტანციურ სანოტარო მოქმედებებს, როგორიცაა: მინდობილობა, განცხადება/გარიგება, კომპანიის კრების ოქმის დადასტურება. საქართველოს სანოტარო სისტემა გადასულია ელექტრონულ საქმისწარმოებაზე. ერთიან ელექტრონულ სანოტარო რეგისტრში ყველა ტიპის სანოტარო მოქმედება რეგისტრირდება. საჯარო აქტის ფორმით შესრულებული სანოტარო აქტები დასკანერებული სახით ინახება ელექტრონულ სანოტარო რეგისტრში. პალატა ახორციელებს არქივის დიგიტალიზაციის პროექტს, რომელიც აღჭურვილი იქნება სათანადო პროგრამული უზრუნველყოფით და უსაფრთხოების მაღალი დონით. პალატის სტრატეგიული მიზანია გაიზიაროს ევროპული დირექტივით გათვალისწინებული კომპანიების ფორმირების წესი და ქართულ ნოტარიატში მოახდინოს ციფრული სანოტარო დოკუმენტისა და ხელმოწერის დანერგვა. ციფრული ხელმოწერის დანერგვასთან დაკავშირებით პალატა გეგმავს გაითვალისწინოს ევროკავშირის წევრი ქვეყნების გამოცდილება. ამ ეტაპზე საქართველოს ნოტარიუსთა პალატაში მიმდინარეობს მუშაობა შესაბამისი სამართლებრივი აქტის პროექტის მომზადებაზე.

კონფერენციაში ქართული და გერმანული

ნოტარიატის, იუსტიციის სამინისტროს, სასამართლო ხელისუფლების, ადვოკატთა კორპუსის, მედიატორთა ასოციაციის, სამეცნიერო სფეროს, გერმანული პარტნიორი ორგანიზაციის - IRZ-ის და სსიპ-ების წარმომადგენლები მონაწილეობდნენ. კონფერენციის დახურვისას შემაჯამებელი სიტყვები წარმოთქვეს ნოტარიუსმა ნინო ხოფერიამ, საჯარო რეესტრის თავმჯდომარის მოადგილემ ვახტანგ ბოხაშვილმა. საჯარო რეესტრის თავმჯდომარის მოადგილის ინფორმაციით, საჯარო რეესტრში იგეგმება ინოვაციური სერვისის დანერგვა, რომლის ფარგლებშიც უძრავი ქონების რეგისტრაცია შესაძლებელი იქნება სახლიდან გაუსვლელად. ხელოვნური ინტელექტის მეშვეობით მოხდება განმცხადებლის ამოცნობა და იდენტიფიცირება და უფლება ტრანზაქციის შესაბამისად დარეგისტრირდება.

ურთიერთთანამშრომლობის ღონისძიების ფარგლებში ასევე გაიმართა შეხვედრა საქართველოს და გერმანიის ნოტარიუსთა პალატების წარმომადგენლებს შორის. მსჯელობა შეეხო ისეთ საკითხებს, როგორიცაა ნოტარიუსთა პროფესიულ კანონმდებლობაში ცვლილებები, სანოტარო დამოწმებისას ფულის გათვორების რისკების პრევენცია, შშმ პირთათვის სანოტარო მომსახურების გაუმჯობესება.

გერმანიის ნოტარიუსთა ფედერალური პალატის საერთაშორისო ურთიერთობების წარმომადგენელმა რიხარდ ბოკმა ნოტარიუსთა პალატის თავმჯდომარე დავით ფუტკარაძესა და ნოტარიუსებთან კერძო სამართლისა და ნოტარიატის კვლევითი ცენტრის დაფუძნების თემაც განიხილა და ქართულ მხარეს ამ მიმართულებით არსებული გერმანული პრაქტიკა გაუზიარა.

სამუშაო შეხვედრა ქართულ-გერმანული ნოტარიატის ურთიერთთანამშრომლობის ფარგლებში გაიმართა და მასში მონაწილეობა გერმანულ კოლეგებთან ერთად ნოტარიუსთა პალატის გამგეობის წევრებმა და ნოტარიუსებმა მიიღეს.